

Isanquenayeetiniri Ijorioririnte

**Yanaacotaqueri Quirishito itsipapee itiancanepee
Tasorentsi, ipincatsaritasanoti.**

1 ¹Peerani yora Tasorentsi yoamejeitaqueri yora quenquetsatacantayetsiniri. Aparopee ineasanotiri Tasorentsi, irio itsipa iquemashitacari ineanatiri, irio itsipa ineiri inampire, irio itsipa aisati imishitacaacari, maaroni. Aiquero yovainiri, aiquero yovainiri, yoamejeitaqueri. Impoiji iriori yovaajeitaqueneri yora ashanincapeeni.

² Meecaquea yoametasanojeitaquee itomisanori iriori Tasorentsi.

Tempa iriotaque irinti anaacojeitiriri atiri ipincatsariti. Icantiri peerani: “Notomi, aviro vetsiqueroneri quipatsi, inquite, maaroni; pincantacantayetero maaroni”. Ari imoncarataqueneri icantaqueririri.

³ Ishiasanotaqueri iriri, ishipaquireasanotaque, ipincatsaritasanotaque. Tempa yanaacojeitiri atiri ipincatsariti. Ariorica irinintanaque irimayetaquero paitapeerica, intasoncaque. Ari imajeitaquero maaroni icantajeitiri catsini: apatiro ineanataque, mataca. Peerani ainironi antayetironi caari cameetsatatsi, irootaque caari acameetsatantaveitani. Iro cantaincha ipocaque irinti icamimentajeitaquee yoameetsajeitantzajeeri. Ipianova aisati anta inquitequi, isavicapaaji iracosanoriqui Tasorentsi, icaratiri ipincatsarijeiti.

Yanaacotaqueri Quirishito inampirepee Tasorentsi, ipincatsaritasanoti.

⁴ Irisati aisati anaacojeitiriri inampirepee Tasorentsi, ipincatsaritasanoti, tempa icantiri Tasorentsi: “Notomi”.

Ishanincatasanotacari. ⁵ ¿Icantirimpaa Tasorentsi inampire: “Aviro notomi, meeca notomintaquempi”? Te intominteariji inampirepee, irintiquea irinti Quirishito. ¿Icantirimpaa inampirepee: “Narotaque pirintajeitari, notomintajeitaquempi”? Te incanteriji. ⁶ Aisati peerani, ipocantacari itomi quipatsiquica, icanti: “Nocoacaajeitaqueri maaroni nonampirepee impincatsajeiteri notomi”. ⁷ Icanti Tasorentsi: “Notiancapinitiri

nonampirepee yovaajiniri ashaninca noneane, ishintsitasanojeiti. Ainiro shiaarantaquerori paamari".⁸ Iro cantaincha icantiri Itomi irinti: "Oshequi pipincatsariti, oshequi pitasorentsiti: pincantaitatiyempani. Ocameetsatasanotaque pineane, oqueariotasanotaque. ⁹ Oshequi pinintacaajeitaqueri atiri intime cameetsa; te pinintacaajeiteriji catsini irantero caari cameetsatatsi. Noveshireacaasanotaquempi, panaacojeitaqueri itsipapee piveshireasanotanaca avinti".¹⁰ Aisati icantiri: "Pincatsari"; tempa icantiri: "Oshequi pipincatsariti avirori. Peerani povetsicaquero quipatsi, inquite, aisati maaroni timantajeitarori.^{11,12} Coajica ompeajeitanajea, irompa avinti pincantaitatiyempani pintime. Oquempeta maatsaraantsi yojoqueetiro irantajeari iroquerari, aisati pinquempetacantajero iroori quipatsi: pojocajero povetsicantajeari pashini. Irompa avinti, eiro pipashinitatsi, eiro pipeatsi catsini".¹³ ¿Icantirimpa Tasorentsi inampire: "Pisavique nacosanoriqui irosati impincatsarijeitantzimpri quisajeivetimpri"? Te incanteriji, irinti icanti itomi irinti. ¹⁴ Tempa irio inampirepee antayetiniriri icoacaajeitaqueriri: yamenacoventajeitaqueri maaroni yora oavisacotajanchaneri.

Ocameetsati anquemisantasanojeiteri Itomi Tasorentsi.

2 ¹Icoacaasanojeitaquee Tasorentsi anquenqueshiretasanotermaaroni icantajeitaqueeri Itomi: tempa oqueariotasanotaque, te oncameetsateji ampeacotearo icantajeitaqueeri. ²Tempa oqueariotasanotaquemaaroni icantajeitiriri inampirepee, aisati yoasanquetaajeitaqueri Tasorentsi maaroni caari quemisantajeitavaqueri: ineacarove. ³Meeca oshequi ipomerentsiventajeitaquee Itomi yoavisacojeitantzimpri. Ariorica antseenajeiteri, ¿pijitimpa eiro yoasanquetaajeiteetsi iriri? Ijivataque Avincatsarite iriori yoamejeitaqueri iroamerepee jaoca ancantajeiteari avavisacotantajeitajeari; impoijiquea yovaajeitaqueero arori yora quemajeitaqueriri. ⁴Janicarica icoacaapiniyetiri Tasorentsi itasoncantayeti, imatacaaqueri; aisati omatacaaajeitiri Ishire paitapeerica, caari amati arori. Ari aneajeitaqueri, ayojeitantzacari queariotaque icantiri Tasorentsi.

Coajica impincatsajeiteri maaroni atiri Jesoshi.

⁵ Ari meeca nonquenquetsatacoteropashini quipatsi onta inquitequiniri: ora asavijkeitaptapaaejeari coajica. Eiro anta ipincatsariventajeitajeetsi inampirepee Tasorentsi, ⁶eiro catsini. Tempa peerani icantirini Iravirini Tasorentsi: "Te nonquempetempiji avinti, te nontasorentsiteji narori. ¿Paita piquenqueshiretantanari? Tecatsi pinquenqueshireimentenari. Aisati, ¿janicampa yora poneachaneri inquitequi, yora atiritapaatsineri? ¿Paita pineacameetsatantariri iriori? ⁷Ariorica impocapaaque quipatsiqui, eiro imoncaratapajaritsi pinampire ipincatsariti. Iro cantaincha

eiro osamanitasanotitsi iranaacotajeri aisati, impincatsaritasanotaje. Pisavicacaajeri cameetsa, pimpeajeri pincatsarisanori.⁸ Pincanteri: ‘Pincantacantajeitetro maaroni. Ari impincatsajeitempi maaroni timajeitajantsineri’”. Irootaque isanquenatiniri Iravirini. Pineaquero, icantiri: “Pincantacantajeitajero maaroni, impincatsajeitempi maaroni timajeitajantsineri”. Tequera omoncarateaji maaroni, iro cantaincha⁹ ayojeitaque peerani iponeanaca Jesoshi inquitequi, ipocaque quipatsiqui. Te impincatsaritasanotapeeji, te irimoncaratapaajeariji inampire Tasorentsi ipincatsariti. Oshequi yoashinonqueevetacari, icamimentajeitaquee, irootaque caari ajajiteitantea Sharincaveniqui. Irio tiancaqueriri Tasorentsi ayojeitantacari oshequi ineshinoncajeitaquee. Meeca cameetsa isavicapaaaji inquitequi, ipincatsaritasanotapaaji aisati.

Icamantaquee paita icamantacari Jesoshi.

¹⁰ Ari yovetsicajeitaquee maaroni, irootaque meeca ampincatsajeitanteeariri maaroni; tempa itasoncaquee atimajeitantacari meeca. Oshequi iquematsicatimentajeitaquee, irootaque ocameetsatantari ampincatsajeiteri, avavisacojeitantajeari; tempa aitaque icoaque intomintajeitajee Tasorentsi maaroni, icoaque iraajeitajee inquitequi. ¹¹ Ari yoameetsajeitaquee Jesoshi, meeca acantajeitiri Iriri iriori: “Apa”. Irootaque caari ipashiventacantee Jesoshi icantajeitee: “Iye”, aisati: “Tsio”. ¹² Tempa ocanti Sanquenarentsi: “Icantiri Quirishito Iriri: ‘Noncamantajeiteri iyepree aisati tsiopee jaoca picanta; noncarajeiteri nompampoyaventajeitempi’”. ¹³ Ocantti pashini Sanquenarentsi: “Noncarajeiteri iyepree aisati tsiopee nonquemisantajeiteri Tasorentsi”. Iro pashini ocanti: “Apa, pineaques aca, nocarajeitiri aisati pitomipee, aisati pishintopee. Irootaque pitimacantacariri noshanincajeitajeari”. ¹⁴ Arojeitaque atiri itomipee Tasorentsi, irishintopee; caamaneri anajeitaque. Ari iquempejeitapaaquee Jesoshi, icamimentajeitapaaquee. Intsoncajeiteri camaari, coavetachari iroajeiteeme aisati iraajeitanaqueeme Sharincaveniqui. ¹⁵ Peerani atsaroacaajeiveitaroni ancamajeiteme, acantatiani; meeca te antsaroajeitanajeji, irointi aveshireajeitanaja. ¹⁶ Te irio irintacotapeempa Jesoshi inampirepee Tasorentsi, aintiquea intacojeitapaaaca aroripee: maaroni joripee. ¹⁷ Ari yatiritapaaque, irirentijeitapaaquee; iquempejeitapaaquee arori, irootaque iotantacari ineshinoncajeitaquee aisati icantaqueri Tasorentsi irineshinoncajeitee iriori. Aisati imajeitaquero maaroni icoacaajeitaqueriri Tasorentsi, icamaque yoameetsajeitancariri maaroni antirori caari cameetsatatsi, meeca yaacameetsajeitaquee Tasorentsi. ¹⁸ Oshequi iquematsicatacaro iriori; aisati ineantavetacari camaari, irantacayerime caari cameetsatatsi. Meeca aroripee, arioric aqumatsicayetearo paitapeerica, aisati arioric irineantavetaquee

camaari, ioti irinti Jesoshi aitaque ocantari. Irootaque iotantacarori intac ojeitaquee.

Yora Quirishito, yanaacotaqueri Moishishi ipincatsariti.

3 ¹Meeca, noyemisantaririnte, noncamantempi te pinquempejeiteariji yora caari quemisantatsi: icoyeajeitaquempi avinti Tasorentsi pintsipajeitanteeariri anta inquitequi. Pinquenqueshirejeitanquaqueri Jesoshi, jaoca icanta: iquempejeitacari maaroni itiancaneppee Tasorentsi, icamantajeiteero maaroni icoacaaqueeri Tasorentsi. Aisati iquempetacari yora ivincatsarite saserote: yovaajiniri Tasorentsi acoacotiriri arori. ²Peerani yora Tasorentsi icantaqueri Moishishi: “Cameetsa poamejeiteri pishanincaphee, piotacaajeiteri maaroni noocoacaajeitaqueriri”. Ari iquearioventaqueneri Moishishi maaroni icantaquerirri Tasorentsi. Yora Jesoshi yanaacotasanoataqueri Moishishi, iquearioventasanotaqueri Tasorentsi maaroni icantaquerirri, catsini. ³Tempa aneacameetsatasanotiri yora vetsquirori ivanco: te aneacameetsatasanoteroji ivanco irointi. Tempa irio iotatsiri irinti yovetsiqui: te ioteji pancotsi ovetsicajea irosati. Aisati ocameetsati aneacameetsatasanoteri Jesoshi, oshequi ipincatsariti; eiro aneacameetsatasanotirtsii Moishishi irinti, te impincatsaritasanoteji. ⁴Timatsi vetsquirori maaroni pancotsipee, iro cantaincha yovetsicajeitaqueri Tasorentsi maaroni timajeitatsiri, catsini. ⁵Ari cameetsa iquearioventiniri Moishishi Tasorentsi maaroni icoacaayetaqueriri, iro cantaincha iquempetacari inampire. Intavetacaro yoamejeitaquee capichaji yantayetiri Tasorentsi.

Iquisaqueri Tasorentsi tseenquiriri aisati piatsatariri.

⁶Iro cantaincha, Quirishito irinti, iquearioventasanotiniri Tasorentsi maaroni icoacaqueriri. Caari ini inampire, irinti itomisanori. Ariorica ancanteani ashirejeiteari, ayojeitaque iraajeitanaquee anta inquitequi, irootaque ocameetsatantari anquimoshirejeite, impoiji ayojeitaque ashanincajeitacari Tasorentsi. ⁷Jero oca osanquenatacaaqueriniri Ishire Tasorentsi yora Iravirini: “Meeca pinquemajeitavaquero icantiri Tasorentsi. ⁸Eiro piquishiritsi, eiro pitseenquiritsi: eiro piquempetaritsi yora piatariniri peerani. Ipiavetacari peerani Tasorentsi anta caaraiteriqui, ijivetani eiro yoasanquetairitsi. ⁹Icantini iriori: ‘Queario ipiajeivetaquena narori pishanincani peerani. Ocarataque 40 osarintsi natsipetashita notasoncacoventiri. ¹⁰Iro cantaincha ipiajeitaquena, irootaque noquisajeitancariri narori, nocantaquerini: Oshequi pitseencaquena, te pinquenqueshiretenaji. Te pincoajeiteji piojeite paitarica noocoacaajeitaquempi. ¹¹Noquisaqueri, irootaque nocantasanoantacariri: Eiro pareejitatsi anta Canaqui, aisati eiro pareejitatsi aca ocameetsaitetica’”. Irootaque isanquenatiniri peerani Iravirini.

¹² Queariompia, noyemisantaririnte, pitseenquiricari Tasorentsi: te oncameetsateji. Yanei irinti, icantani. Iro cantaincha ariorica pintseenqueri, pimpeacoteari: eiro piquenqueshiretajiritsi aisati.

¹³ Irointi ocameetsati meecca pinquemisantacaapiniteri pishaninca maaroni quitaiteri: coajica eirorica pimatirotsi. Eirorica iquemisantajeiti meecca, incanteani irampitapinitero caari cameetsatatsi, irametearo: impoiji oshequi iramatavitaquea, eiro icoitsi catsini inquemisante.

¹⁴ Ariorica ancantaitatiyempani ashireteari Quirishito, ayojeitanaque ancarajeiteri ajajeitanaque inquitequi: eiro yamataviteetsi. ¹⁵ Iro cantaincha pinquenqueshiretajero isanquenatiniri Iravirini: “Meeca pinquemajeitavaquero icantiri Tasorentsi. Eiro piquishiritsi, eiro pitseenquiritsi: eiro piquempataritsi yora piatacariri peerani”.

¹⁶ Peerani yora ejipitosati oshequi yoashinoncaajeitaqueri maaroni intacantajeitaqueeri. Ari icantajeitiri Moishishi: “Tsame, naajeitanajempi pashiniqui quipatsi, cameetsaquea asavicajeitantzeari”. Icantajeiti: “Cameetsa, tsame ajajeite maaroni”. Iro cantaincha tempa iriojeitaque piajeitacariri Moishishi aisati Tasorentsi. ¹⁷ Irootaque ishemantacariri Tasorentsi. Ocarataque 40 osarintsi ishemacari. Oshequi yantajeitaquero iriori caari cameetsatatsi, irootaque ishinetantacariri icamajeitaque anta caaraiteriqui. ¹⁸ Te inquemisantajeiteriji, irootaque icantasanotantariri: “Eiro pareejeitatsi anta ocameetsaiteti”. ¹⁹ Pineaquero, itseencajeitaqueri Tasorentsi, irootaque caari yareejeitanta iriori anta ocameetsaitetinta.

Icoaque Tasorentsi areejeitea anta ocameetsaitetinta.

4 ¹Pamene, icantajeitaquee Tasorentsi: “Arriorica pinquemisantajeiteni pisaviquimojeitena aca nonampiqui, aca ocameetsaitetica”. Iro cantaincha queariompia, piquempataricari yora peeraniniri caari areetachani. ²Ocameetsatasanotini ora icashiacaavetacariniri Tasorentsi, aisati ocameetsati oca icashiacaajeitaqueeri arori. Iro cantaincha te inquemisantajeiteni iriori, irootaque yatsipetashitantanacarori icamantirii.

³ Arriorica aquemisantasanaqueri Tasorentsi, ari areetasanotaquea anta ocameetsaitetinta, iro cantaincha eiro yareetatsi yora caari quemisantiri. Tempa icantiquerini Tasorentsi: “Noquisaqueri, irootaque nocantasanotantariri: ‘Te pinquemisantenaji, irootaque eiro pareetantatsi anta ocameetsaitetinta’ ”. Peerani, tequerani irovetsquieroni quipatsi, yovetsiquitavetanari irisavicanteameri, iro cantaincha te irareejeiteaji.

⁴Ayojeitaque yovetsicajeivetacaro maaroni, moncarataca. Tempa ocanti Sanquenarentsi: “Ocarataque 6 quitaiteri yovetsicajeitantanacarori Tasorentsi maaroni; moncarataca. Impoiji, quitaiteri 7 yoipacaquero yovetsicantaque, ari ocarati”. ⁵Ari yovetsicavetanari, iro cantaincha te inquemisantajeiteriji irioripee, irootaque icantantari aisati Tasorentsi: “Eiro catsini yareejeitatsi aca ocameetsaitetasanotica”. ⁶Ari

ocameetsataque ora icantaqueriniri Tasorentsi, iro cantaincha eiro yareejeitatsi iriori yora icantaqueniri: pinequero, te inquemisantajeiteji. Iro cantaincha intimaarantaje areetajanchaneri. ⁷Icanti Tasorentsi: “Meeca quea nocooacaajeitaqueri atiri inquemisantajeitena irareejeitantzareni jenoqui”. Irootaque isanquenatacaaqueriniri Iravirini: “Meeca, ariorica pinquemavaqueri Tasorentsi inquenquetsatacayempi, eiro piquishiritsi, eiro pitseenquiritsi”.

⁸ Arime irareetacaajeearime Josoe ishanin capee anta ocameetsaitetinta, ¿arimpa impoiji irisanquenatacaaquerime Tasorentsi Iraviri: “Coajica irareejeitea quemisantajeitanari anta ocameetsaitetinta”? ⁹Irootaque ayojeitantzacari coajica ajajeitaje maaroni quemisantatsiri anta ocameetsaiteti, eiro anta apomerentsitapajatsi antsameejitejate. ¹⁰Peerani itsongcantacarori Tasorentsi yovetsicayetaque, yoipacaquero, tecatsi irantaje aisati. Aisati arorije, ariorica ajajeite iriori quinta, anquempejeitapajeari, amaoreajeitapajae, tecatsi antajeitapajae. ¹¹Tsame ancoasanojeitajero areejeitacea anta: eiro apiatsataritsi, eiro atseenquiritsi. Eirorica aquemisantasanotiri, eiro areetajaritsi. ¹²Aneatsiri ini Tasorentsi, oshequi itasorentsiti; imatasanotaquero maaroni icantajeitiri. Tecatsi ompomerentsitimoteari, ioti jaoca ocantari aquenqueshireantari aisati ashire; ioti catsini jaoca acantari; iotiro maaroni aquenqueshirejeitiri aisati maaroni acoajeitiri. ¹³Tecatsi materone irimanapitsateari: ineasanojeitaquee maaroni; jaocarica asavicajeitiri, ineajeitaquee. Itsoteayetiro quipatsi, maaroni; iquenqueshirejeitaquee maaroni.

Yora Jesoquirishito iquempevetacari ivincatsarite saserote.

¹⁴ Ari ijataji Jesoshi anta inquitequi, itsipatapajari iriri, yora Tasorentsi. Ainiro meeca icantiri Iriri: “Pincavintsaajeiteri quemisantajeitanari”, iquempevetacari yora ivincatsarite saserotepee, irootaque ocameetsatantari ancantaitatiyempani anquemisantajeiteri. ¹⁵Yatiritapaaqueni peerani, iquematsicayetacaro paitapeerica, aisati yora caamari iriori irantacayerime caari cameetsatatsi, iro cantaincha tecatsi irante. Iotitantaqueerori irinti maaroni aquematsicayetari aisati jaoca icantaqueerri camaari. Ioti opomerentsitimoteitaquee, iro cantaincha icavintsaasanojeitaquee. ¹⁶Eiro meeca atsaroacaajeitajaritsi anquenquetsatacayeri Tasorentsi: ayojeitaque irineshioncajeitaquee, incavintsaasanojeitaquee. Eiro ishineteetsi ashinoncaajeitea.

Icoacaquaqueriri Tasorentsi yora ivincatsarite saserote.

5 ¹Ari ipeaqueri Tasorentsi atiri ivincatsarite saserote, icoacaapinitiri iramanacoventajeitee arori. Irio vaaqueneriri Tasorentsi paitarica apajeitiriri. Antajeitiro caari cameetsatatsi, irootaque maaroni

osarintsi yoantanariri saserote Tasorentsi aparoni virantsi cameetsari, itaaqueneri. Impoiji yaacameetsajeitaquee maaroni quemisantatsiri, iquempetacantajeitaquee te antajeiteroji caari cameetsatatsi.² Ari iquempejeitaquee arori, atiri ini; te irimateroji intime cameetsa catsini, irointi timatsi yantiri iriori caari cameetsatatsi. Irootaque iotantacari icavintsaajeitaquee ariorica antero arori caari cameetsatatsi.³ Aisati ariorica yoiniri Tasorentsi ovisha, iquenqueshiretiro antanepee arori, aisati irantane iriori.⁴ Te irisati peashitachane ivincatsarite saserote, irinti peaqueri Tasorentsi; oquempetaca peerani ipeaqueri Aaro isaserotetantacari.

⁵ Aisati iquempetaca Quirishito: te irisati peashitachane quempetearine saserote, irinti peaqueri Apa Tasorentsi. Tempa icantiri peerani: “Aviro notomi, meeca quitaiteri notomintaquempi”.⁶ Pashini aisati icantiri: “Pincantaitatiyempani pisaserotetanaque, pinquempeteari iriori Merequiserequi”.

⁷Peerani, yatiritantapaintaniri Quirishito, oshequi iquenquetsatacapinitiri Iriri, iraasanotacani, aisati ijajuitacani; icantiri: “Apa, ariorica noncame niotaque pimatajena pointinaajena”. Ari oshequi ipincatsataqueri Tasorentsi, irootaque imatantacarori iriori icoacairiri.⁸ Queario, itomi Tasorentsi ini, iro cantaincha iquemisantiri Iriri, irootaque iquematsicatantarori paitapeerica. Meeca ariorica anquemisante arori, aisati anquematsicatearo paitapeerica, iotiro irinti jaoca ocantari.⁹ Ari imatasanotaquero maaroni icoacairiri iriri, iquemisantasanojeitiriri iriori. Meeca eiro ajajeititsi Sharincaveniqui, ainti ajajeite inquitequi, ancantaitatiyempani asavicajeitapaaje.¹⁰ Iriotaque ishiacantaqueri Tasorentsi ivincatsarite saserote, icanti: “Irio iquempetaca notomi Merequiserequi iriori”.

Tequera inquemisantasano note yora isanquenatiniri.

¹¹ Nocoavetaca nontsoteajeitempirome maaroni oca, noametasanojeitempirome. Otimaveta piotantavetari, iro cantaincha te pinquemisantavaquenaji, irootaque caari piquemantavacaro.

¹² Oncameetsateme poamejeiterime meeca itsipapee, iro cantaincha ainirotatsi picoajeiti oamejeitempineri. Picoajeiti nampiitajempiro caari pomerentsitatsi. Piquempetacari jananequi: coatsimpi pantsomite, te paveeroji pantsiquero poyeari.¹³ Queario, piquempejeitacari jananequi, coatsimpi pantsote: tequera piotasanojeitero Irineane Tasorentsi oamejeiteeri jaoca ancanteari ancameetsajeitantzajeari.¹⁴ Piotasanoterime Tasorentsi, pincoajeiteme poyeari pantsicasanoterime. Piotaqueme paita cameetsatatsiri antajeitaqueri, aisati piotaquerome caari cameetsatatsi eiro pantirome.

Icamantiri sanquenatirori paita isanquenatantariri.

6 ¹Eiro napiitapinitajimpirotsi oca noametacotapinitiriri Quirishito: te ompomerentsiteaji. Eiro meeca picantajanatsi: “Pampiitapinitajenaro”. Ocameetsati aiquero pijatatiye piotasanolanaquero maaroni icoacaajeitaquempi Tasorents. Nocantimpini peerani: “Eiro pantashiyetarotsi paitapeerica, eiro oavisacotimpitsi: tecatsi pincantea oavisacotajea avisati. Ocameetsati pinquemisanteri Quirishito pavisacotantajeari. ²Pivaotisatimentajeiteari iriojeitanteari atiri piquemisantiri. Ariorica pincanteri Tasorents iramitacoteri piyemisantarinte, pipamijeitaqueri. Ariorica ancamajeite antinaajeitanaje aisati, impoiji incantacoventajeitee Tasorents”. Ari eiro napiitajimpirotsi oca piotitaniri, ³iointi ariorica irinintacayena Tasorents, noametempiro iroaquerari, caari piquemapiniti.

⁴⁻⁶Pamene. Ainiro ashaninca quemavetaroniri irineane Tasorents, iveshireimentavetacari Tasorents, amitacovetacari Ishire iroori. Iovetaca ocameetsati irineane Tasorents; iovetaca coajica impincatsariventajeitee Quirishito. Iro cantaincha yojocajiro iquemisantaveitani. Ariorica yojocajiro iquemisantiri Itomi Tasorents, oquempetaca icoaque irampiitajerime aisati impajacotacantajeri. Itseencaqueri, icoaque intseencaaajeiteri itsipapee atiri, irishirontimentajeitanteeari Quirishito. Ari tecatsi incantajea inquemisantasanojte yora quemisantaveitachaniri. Queariyea, piquempetaricariyea avirori. ⁷Ariorica cameetsa oparii incani quipatsi qui aisati onintiro panqurients, otimaque yoajeitari yora panquitirori. Tempa iriotaque Tasorents oameetsantirori quipatsi onintantarori panqurients. ⁸Iro cantaincha ariorica pineaquero oantsi qui saveshiniro aisati otsipapee totsequishi, tempa picanti: “Te oncameetsateji, tsame anquiacojeitero, antaaajeitero maaroni”. Queariyea, piquempetarocari avirori, iointi pinquempetearo cameetsari quipatsi.

Iveshireacaacari yora isanquenatiniri.

⁹Ari nocantavetaquempi: “Pitseenquicari”, aisati nocantimpi: “Piquempetarocari quipatsi oshiocantari saveshiniro”. Iro cantaincha, noshaninca, nonintajeitaquempi. Naamaaca cameetsa pisavicajeitaque, aisati iroavisacojeitempi Tasorents. ¹⁰Tempa icameetsataque, eiro ipeacotarotsi maaroni pantiniriri: ioti piquearioventaquero icoacaimpiri, ioti picavintsaajeitiri piyemisantarinte, picantani. ¹¹Nocoacaasanojeitaquempi pinquearioventajeitero pintintajeiteri itsipapee, pincanteani, irosati omoncaratanteari impinatantempi Tasorents. ¹²Eiro piperaventarotsi icoacaimpiri Tasorents, iointi pinquempejeiteari yora itsipapee quemisantasanojiriri, quearioventiniriri maaroni icoacaajeitiriri iriori. Queario irineajeitero maaroni icashiacaajeitaqueriri.

¹³ Pamene, ariorica ancoaque ayotacaasanoteri itsipapee ashánica queario oni acantaqueriri, acantiri: “Ioti Tasorentsi queario oni oca nocantimpíri. Yanaacojeitaquee irinti, ipincatsaritasanoti. Ariorica namatavitempi, yoasanquetanacari”. Timatsi meeca icantaqueeri Tasorentsi, iro cantaincha tecatsi anacoterine irinti, tecatsi oasanquetayerine irinti. Apatiro icantiri Avarama: “Queario oca noncamantempíri nainti, tempa naro Tasorentsi: eiro nopashiniyetirotsi noneane”. ¹⁴ Impoiji icantiri: “Queario, nontasoncacosentempi, oshequi nintacotempi; aisati noshequiaqueri pishaninca”. ¹⁵ Ari yoyeasanotaqueri Avarama, impoiji ineasanotaquero maaroni icashiacaíriri. ¹⁶ Tempa ariorica ancoaque ayotacaasanoteri itsipapee ashánica queario oni acantaqueriri, acantiri: “Ioti Tasorentsi queario oni oca nocantimpíri. Yanaacojeitaquee irinti ipincatsaritasanoti. Irimatacayena nontsoteaquempiro maaroni nocantimpíri. Ariorica namatavitempi, iroasanquetaquena iriori”. Ariorica ayotaque ipincatsatasanotaque Tasorentsi, ari ashiretasanotearo icantaqueeri. ¹⁷ Ari otimini icashiacaajeitacariniri Tasorentsi yora peeraniniri. Icoqueni iriojeite eiro yamatavijeitiritsi, irootaque icantasanotantariri: “Queario oca noncamantempíri nainti, tempa naro Tasorentsi: eiro nopashiniyetirotsi noneane”. ¹⁸ Ari oqueariotasanotaque irineane Tasorentsi: te irioteji intseeya. Iro cantaincha aisati icantini: “Queario oca noncamantempíri”, ayotasanojeitantacari eiro catsini yamatavitantsi. Meeca, ariorica aventeari iroavisacojeitajee, ayotasanojaquee irimataqueero oca icantaqueeri: iroavisacotasanojeitee. ¹⁹ Ariorica ayojeitaque avavisacotaca, tempa aveshireasanotaca, eiro aquenqueshiretajatsi aisati. Ayojeitaque ocameetsataque anquenquetsatacaaajeiteri meeca Tasorentsi, aisati coajica areejeiteari: tecatsi ticavaqueene. ²⁰ Ijivajeitanaquee Quirishito, icamantacosentempi: iquempetacari yora Merequiserequi, ivincatsariteni saserote peerani.

Yora Merequiserequi yanaacojeitaqueri isaserotetasanotaque maaroni ishanincani Irevi.

7 ¹ Ari meeca nonquenquetsatacoteri yora Merequiserequi: peerani ipincatsariventajeitaqueri yora saremisati. Aisati Tasorentsi iriori, yora savicatsiri inquitequi, ipeaqueri saserote, icanti: “Irio saserotetatsinsne yoca”. Ari itimi pashiniqui nampitsi Avarama. Yaajeitanaqueri iratiritepee, ijajeitanaque imanajeitiri yora iisaneentane, yora noshiquiriri itomitsori: oshequi inajeiveta, iro cantaincha ipoyereajeitaqueri maaroni, ivincatsaritepee, maaroni. Ari ipianaja Avarama, yoipiajiri itomitsori, aisati yamayetajiro ivararoni yora yovaitiri. Ipiantajari, itonquiota vacare Merequiserequi, icantiri Tasorentsi: “Pintasoncacosentempi Avaramaca cameetsa irisavicanteari”. ² Impoiji yaarantaji Avarama vaararontsi,

ipaarantaqueri, icantiri: "Jeroca irashi Tasorentsi". Otimirica 10, ari ipaqueri aparoni. Ari ipajita iriori Merequiserequi. Acantiri aneanequi: "Cameetsatatsiri". Ipincatsariventajeitiri saremissati. Ocantiri Saremi aneanequi: "Cameetsa asavacajeiti".³ Ora sanquenarentsi tecatsi onquenquetsatacoteri iriri Merequiserequi. Tecatsi onquenquetsatacoteri iriniro, icharine, tecatsi. Tecatsi onquenquetsatacoteri itimantacari aisati icamantacari. Oquempevetaca icantani itimini, irootaque ishiantacariri itomi Tasorentsi; icantani iriori isaserotetanaque, icantapinitiri Tasorentsi: "Pintasoncaventeri maaroni quemisantanari".

⁴ Pinequiero, oshequi ipincatsaritini Merequiserequi. Intacantajeitaqueeniri peerani Avaramani, iro cantaincha ipincatsatiri, aisati ipaarantaqueri ivaararoni imanatiniri.⁵ Pamene, impoiji catsini itimi ishanincani Avaramani: yora Irevi. Isanquenatacaaqueri Tasorentsi Moishishi, isanquenatantarori: "Icoaque Tasorentsi impeaquea ishanincani Irevi saserotetatsineri. Nocoaque maaroni ijorioririnte impaaranteri iriori ivararo, ivira, maaroni: intimerica 10, ari imperi aparoni". Pinequiero, ishanincani Avaramani inajeitini: ishanincani Irevi aisati maaroni ijorioririnte. Ishanincatavacaajeitaca.⁶ Iro cantaincha peerani yora Merequiserequi te irishanincatearini Avaramani, inashita iriori; iro cantaincha yaavaquero maaroni ipaarantaqueriri iriori, aisati icantacoventaqueri yora intacantajeitaqueeri: yora icashiacaqueri Tasorentsi.⁷ Pinequiero, yora Merequiserequi anaacotantatsiri ipincatsariti, irootaque icantantariri Tasorentsi: "Apa, pintasoncacoventeri Avaramaca cameetsa irisavicanteari".⁸ Aca ashaninca inajeiti yora ishanincani Irevi, imoncarajeitaquee arorije, acamajeiti, iro cantaincha yaapinitaqueri maaroni apajetaqueriri. Iro cantaincha peerani yora Merequiserequi, inashita: oquempevetaca te incameji irinti, te oncanjeji sanquenarentsi: "Icamaque".^{9,10} Peerani, ipaarantantacariri Avaramaca vaararontsi, tequerani intimeni Irevi: itimi iriori impoiji. Iro cantaincha arime intimitame, impaaranterime aisati iriori: tempa inquempetearime yora jivatatsiri itimi. Aisati inquempejeiterime maaroni ishanincapeeni Irevi: maaroni saserotetatsiri. Aitaqueme impincatsajeiterime Merequiserequi maaroni. Pinequiero, ajorioririnte ipincatsajeitaqueri saserotepee, irootaque ipaarantajeitancariri paitapeerica, iro cantaincha yora saserotepee ipincatsatasanojeitaqueri Merequiserequi: tempa yanaacotantaque iriori isaserotetasanotaque, ipincatsaritasanotaque.

Yora ishanincani Irevi, tecatsi incantee iroavisacojeitee.

¹¹ Ari itimajeiveta yora ishanincani Irevi: yora Aaro aisati maaroni ishanincani iriori, isaserotejeitaque; aisati otimaveta isanquenajeitiniri Moishishi, oamejeitiri paitapeerica antajeitiri. Iro cantaincha tecatsi

incantee iriorije iroameetsajeitee, iroavisacojeitee; irootaque itiancantacariri Tasorentsi pashini saserotetajantsiri, quempetajariri yora Merequiserequi.¹² Ari inashita yora saserotetatsiri, aisati meeca onashita icoacaajeitajeeri Tasorentsi.^{13,14} Itimaveta saserotepee shanincajeitaricari Irevi, aisati isanquenajeitaqueneri Moishishi, yoamejeitiri paitarica yantajeitaqueri. Iro cantaincha yora iroquieratajantsiri saserotetajantsiri te irishanincateariji Irevi, irinti ishanincatacari Jora. Te irisaseroteteji itsipapee ishanincani Jora: te irisanquenajeitenerini Moishishi, te incanteriji irinti impeaquea saserote.¹⁵ Meeca itimi yora quempetariri Merequiserequi, inashita iriori, ayontantacari onashita icoacairiri Tasorentsi.¹⁶ Te irishanincateariji Aaro ipeantacari saserote; irootinti itasorentsitaque aisati icantaitatiani yanei, irootaque ipeantacari saserote.¹⁷ Tempa icantirini Tasorentsi peerani: “Pincantaitatiyempani pisaserotetanaque, pinquempeteari iriori Merequiserequi”.

¹⁸ Otimavetani oca isanquenatiniriri ishanincani Aaro, iro cantaincha te incoyeji Tasorentsi ampomerentsiventearo meeca. Antsipetearome, tecatsi oncanteajeitee oavisacojeitee.¹⁹ Amoncarajeiterome maaroni, eiro oameetsajeiteeme. Iro cantaincha irinti Quirishito aitaque irimatajee iraajeitanajee anta Tasorentsiqui. Te antsipetashiteaji aquemisantajeitaqueri irinti.

**Icanti Tasorentsi: “Queario, incantaitatiyempani
Quirishito irisaserotetanaque”.**

²⁰ Te incantashiteaji Tasorentsi, icantasanozi: “Queario oca noncamantempi, tempa naro Tasorentsi. Incantaitatiyempani Quirishito irisaserotetanaque”.²¹ Te inquempeteariji irinti ishanincajeini Aaro. Iro cantaincha icantiri Quirishito irinti: “Queario oca noncamantempi, tempa naro Tasorentsi. Te noncantashiteaji, eiro namatavitimpitsi. Avirotaque saserote, pincantaitatiyempani”.²² Irootaque ayojeitancari yanaacotantaque Jesoshi isaserotetasanotaque, imajeitaquee yoavisacojeitaquee.²³ Ari icarajeiveitani oshequi saserotevetachaniri, iro cantaincha icamapinijeitaque, yojocapinijeitaquero isaserotetantaniri.²⁴ Irinti Quirishito, icantani itimi: irootaque imatantarori isaseroteti, icantani.²⁵ Imajeitaqueri quemisantajeitiriri: yoavisacotasanojeitaqueri maaroni coasanotatsiri iraanajeri Tasorentsiqui. Icantani yanei, irootaque imatantarori icamantacoventajeitaquee.

²⁶ Queario, ocameetsatasanozi isaseroteventajeitaquee; tempa Tasorentsi ini, te aneroji irantane, te iranteroji caari cameetsatsati; te inquempejeiteariji yora caari cameetsajeitatsi isaviquimojeivetapaintaniri. Meeca isaviqui cameetsa anta inquitequi jenoqui.²⁷ Yora itsipapee saserotetatsiri, maaroni quitaiteri yoapinitiniri Tasorentsi ivirapee, itaapinitiniri. Iro yoapinitantanariri, oshequi iquenqueshiretaquero

caari cameetsatatsi yantajeitiri aisati yantajeitiri iriori ijorioririnte. Tecatsi iroapinite irinti Quirishito, irointi apatiro icamimentajeitaquee: moncarataca, eiro yapiitajirotsi aisati. ²⁸Ari peerani isanquenatini Moishishi, icanti: “Impeajeitanaquea ishanincani Aaro saserote”. Atiri inajeiti iriori, yantajeitiro caari cameetsatatsi. Iro cantaincha impoiji icanti Tasorentsi: “Queario oca noncamantempi, tempa naro Tasorentsi: incantaitatiyempani Quirishito irisaserotetanaque”. Iriotaque Quirishito Itomi, te iranteroji caari cameetsatatsi irinti, icantatiani icameetsatasano taque.

Isaserotetanaque Quirishito anta inquitequi.

8 ¹Piotavaquero oca noncamantempi: iriotaque Quirishito saserotetimentajeitaqueeri. Isaviquimotiri Tasorentsi anta inquitequi jenoqui, anta iracosanoriqui; icaratiri ipincatsarijeiti. ²Yora ishanincani Aaro iquenquetsatacapinitiri Tasorentsi anta pancotsiqui yovetsiquiri atiri, icantashitacaro: “Ivanco Tasorentsi”. Iranti Quirishito isavicasanoti anta Tasorentsi: te irio vetsiquerone atiri, iranti Avincatsarite vetsiquirori inampi iriori. ³Yora ivincatsarite saserote ipapinitiri Tasorentsi paitapeerica; yoqueneri virantsi, shemi; itaaqueneri. Iranti Quirishito, te iroyenerji virantsi; irisati coantsi yoyeetantacariri. Impoiji ijatashitaqueri Tasorentsi, icantapaaqueri: “Narotaque nainti camimentajeitaqueriri ashaninca, oavisacojeitaqueriri”. ⁴Intimeme meeca aca quipatsiquica, eirome isaserotetime; pineaquero, te irishaninateariji Aaro: iriojeitaque ishanincani Aaro tsoteaquerori isanquenatiniri Moishishi. ⁵Yantaveetapiniti anta icanteetirinta: “Ivanco Tasorentsi”, iro cantaincha te anta irisavicasanote Tasorentsi. Apatiro oshiacaventiro inampisanori anta inquitequi. Peerani, yovetsicantarori Moishishi, icantiri Tasorentsi: “Anta toncaariqui pajitachari Shinai noametasanotaquempiro jaoca pincanterori pancotsi: pimoncaratasanotero nocantaquempi”. ⁶Ocameetsavetaca ora isanquenatiniri peerani Moishishi, isaserotejeitancarri Aaro aisati ishanincani, aisati yamitacojeivetacari ajorioririnte. Iro cantaincha oca icantiri meeca Tasorentsi ocameetsatasanotaque, oshequi anaacotaquero isanquenatiniri Moishishi. Aisati iquempetaca, oshequi imatasanotaqueenero Quirishito, oshequi yanaacotaqueri Aaro. ⁷Oncameetsatasanotaqueme isanquenatiniri peerani Moishishi, eirome icantirime pashini Tasorentsi.

⁸ Tempa icantini Tasorentsi peerani: “Tequera omoncarateaji, te oncameetsatasanoteji oca isanquenatiniriri Moishishi Aaro”. Irootaque isanquenatacantacariri itsipapee quemisantatsiniri peerani: “Icanti Avincatsarite: ‘Coajica ontine pashini noncamantajeiteriri maaroni joriopee, onashitanaquea. ⁹Eiro oquempetajarotsi ora nocantaqueriri yora

intacantacaroniri. Peerani isavicaveitani maaroni joriopee Ejipitoqui, iro cantaincha naajeitanqueri pashiniqui quipatsi. Isanquenavetacaro Moishishi noocoacaajeivetacariri, iro cantaincha te inquemisantajeitenaji. Irootaque caari namitacojeitantari.¹⁰ Meeca timatsi noncamantajeiteriri maaroni joriopee. Coajica niotacaasanojeitaqueri maaroni noncantajeiteriri, inquenqueshiretasanojeitero, eiro ipeacojeitarotsi. Impincatsatasanojeitaquena, aisati nontasoncacoventajeiteri narori.

¹¹ Eiro yatsipetashijeitatsi iroametavacaajeitea, eiro icantavacaajeitatsi: "Noshaninca, pioteri Novincatsarite". Aitaque iriotashijeitena maaroni: pincatsaritatsiri, caari pincatsaritatsi, maaroni catsini, iriojeitena.

¹² Noncavintsaasanojeiteri maaroni antirori caari cameetsatatsi, eiro noquenqueshireacotajiritsi aisati yantayetiri¹¹". Irootaque icantitacari peerani Tasorentsi. ¹³ Pineaquero, icantini: "Ontime pashini noncamantajeiteriri atiri, eiro oquempetajarotsi nocantiniri peerani". Ari oca icantiri meeca, irootaque poyetajarori icantiniri peerani.

Iquenquetsatacotiro pancotsi yantaveetantari saserotepee.

9 ¹Peerani icantajeitiri Tasorentsi intacantaqueeniri jaoca incantajeiteari inquemisantajeite, aisati icantiri jaoca oncanteari pancotsi irantaveetanteari saserotepee. ² Ari yovetsicajeitaqueroni pancotsi, imoncarataqueroni icantiriniri Tasorentsi. Anta yantaveetapinitinta saserotepee icanteetiro irashi Tasorentsi. Otimi anta yoantarori vera itsiotari, aisati otimi mesa. Anta mesaqui yoapinitiro tanta, ocarataque 12, aquenqueshirejeitantarori ipapinijeitaquee Tasorentsi avajeitari. ³Otimaque oticaashiro, ainiro ariquerora tecatsi jatapinitatsine, icanteetiro inantasanolatri Tasorentsi iriori. ⁴Otimi ara itaapinitantarori casancapatsari, iro yovetsicantarori oro. Otimi aisati cajo, ipashicantarori oro. Ara tsompoina, otimi coviti yovetsicantarori oro, tsompoina irointi iteyeetiro mana. Aisati otimi cajoqui iotiquiro Aaro, ora shiocashitachaniri peerani oshi. Aisati otimi ora mapi isanquenatacariniri Tasorentsi Moishishi. ⁵Anta otataroqui cajo ishiacantaqueri apite inampirepee Tasorentsi ipajiyetiri querovine. Ishiacantaca ainiro isavicaque Tasorentsi. Yamenajeitaquero otataro cajo anta yoapinitiro maaroni osarintsiqui ivincatsarite saserote iriraja virantsi. Oquempetaca iquenqueshirejeitiri camimentajeiteeri, cavintsaajeiteeri. Eiro meeca notsoteasanotirotsi noncamantempiro jaoca ocantayetari.

⁶Ari yovetsicajeitaquero peerani, imoncarataquero icantiriri Tasorentsi Moishishi. Impoiji iqueapinijeiti saserotepee, yantaveetapinijeiti. ⁷Iro cantaincha te irijatapinijeiteji oticaashiroqui ariquerora. Aparoni ijati maaroni osarintsiqui irinti ivincatsarite. Ijivataque yoiniri Tasorentsi virantsi, impoijiquea iqueanaque apaniro, yaanajiro

iriraja, itecaquero anta otataroqui cajo; icantiri Tasorentsi: "Apa, pincavintsaajeitena, eiro piquishimentajeitanarotsi nantajeitaqueri aisati yantajeitaqueri noshanincapee; eiro piquenqueshireacojeitajanarotsi aisati".⁸ Pineaquero, otimi oticaashiro, ticaajeitaquerir itsipapee saserote aisati maaroni jorioppe. Tecatsi incantajeitea irijajeite anta isavicanasotariqui Tasorentsi. Irootaque oshiacantajeitaqueeri Ishire Tasorentsi, ayojeitancari yora ishanincani Irevi tecatsi incantajeitee irareetacaajeitee anta Tasorensiquinta.⁹ Ocameetsati anquenqueshirejeitero meeca ayojeitanteeari: maaroni ipapinijeitaqueri Tasorentsi, aisati maaroni yoapinitiniri aisati itaapinitiniri, te oameetsajeiteriji yora papinivtariri aisati taapinivetanariri.¹⁰ Peerani yoametashijeitari paitarica yantashijeitari; paitarica yoajeitari, aisati paitarica irajeitiri; yoametashijeitari jaoca incanteari inquivapinitea, paitapeerica. Irootaque icoacaajeivetacariri Tasorentsi atiri peerani. Iro cantaincha ari ocaratini, moncarataca. Ipocapaaque meeca Quirishito aamaajeitari. Meeca onashitaja icoacaajeitajeri Tasorentsi arori, iroqueratajantsiri, ocameetsatasanotaque.

**Yora Quirishito yoameetsajeitiri maaroni
antajeitirori caari cameetsajetatsi.**

¹¹ Ipocapaaque Quirishito iquempvetapajari ivincatsarite saserote, iro cantaincha ocameetsatasanotaque oca yantapaaqueri irinti. Yantaveetini itsipapee saserote anta pancotsiqui yovetsiqui atiri; iro cantaincha irinti, ijatasanotaque anta ivancosanoriqui Tasorentsi: ocameetsatasanotaque irointi anta inquitequi.¹² Aca quipatsiqui yora ivincatsarite saserote ijatapiniti maaroni osarintsi, yaapinitiro iriraja chivo aisati vacajaniqui anta pancotsiqui tsompoina, ora icanteevetari inantasano Tasoentsi. Iro cantaincha Quirishito irinti, icamimentajeitaquee, impoiji ijataji anta inquitequi isavicasanotinta Tasorentsi. Ishiacantaca yaanajiro iriraja: caari oni iriraja virantsi, irointi irirajasanoi iriori. Icantiri Tasorentsi: "Pineaquero, nocamimentajeitaqueri maaroni atiri noavisacotantarjari, incantaitatiyempani irisavicanajeari aca anampiquica". Te irantsipeteaji irinti impiapinite, aparo imataquero, ari ocarati.¹³ Ari peerani ariorica yantironi ashaninca caari cameetsatatsi, yoqueri saserote vaca, iriorica chivo, iriorica vacajaniqui. Impoiji yaaquero iriraja, ipantaqueri yora antirori caari cameetsatatsi. Aisati itaaqueri ivatsa, impoiji ipantaqueri shirampari itsimenquitore virantsi. Impoiji icantajeitiri ishaninca: "Icameetsataji aisati yoca. Ocameetsati incarajeitjeri aisati quemisantatsiri".¹⁴ Irintiquea Quirishito, icameetsatasanotaque irinti, ocantani otimi ishire. Icantiri Tasorentsi: "Apa, nocoasanotaque noncamimentajeiteri atiripee, noavisacojeitantariri". Ari aparajatimentajeitaquee irirajasanoi irinti, te iro iriraja virantsi:

icamimentajeitaquee, meeca eiro atsipetajarotsi anquenqueshiretero caari cameetsatatsi, ora jatacaajeiteenemeri Sharincaveniqui, irointi anteneri Tasorentsi maaroni icoacaajeitaqueeri. Impoiji ancantaitatiyempani asaviquimojeiteri anta inquitequi.¹⁵ Ari peerani apatiro ayojeitaquero isanquenare Moishishi, aisati antapinijeitaquero caari cameetsatatsi, ajajeitanteameri Sharincaveniqui; iro cantaincha icamimentajeitaquee Quirishito, yoavisacojeitantzajeeri. Meeca onashita icantajeitaqueeri Tasorentsi: “Ocameetsaiteti maaroni nocashiacaajeitaqueriri quemisantajeanari nocoyejeitaqueri. Incantaitatiyempani iroveshireimentajeitearo”.

Yoamejeitaquee paita icamimentajeitantzajeeri Quirishito.

^{16,17} Ari pinquenqueshiretero yamejeitacari ashanincapee. Otimirica ivaararopee, isanquenati paperiqui: “Ariorica noncame nocoaque irashiyetajearo noshanincapeeni”. Ari isanquenataquero ivajiropee ashuyetajearone ivaararopee. Impoiji, ariorica incamaque, iriojeitanaque irio ashijjeitajearone. Eirotsitarica icami yora sanquenatirori, eirotsita yaajeitirotsi vaararontsi. Iro cantaincha incamaquerica, moncarataca: impoijiquea iraajeitero.¹⁸ Aisati oquempetacani peerani: otimi icantiriniri Tasorentsi ashanincani peerani. Tecatsi incantea Tasorentsi incame, iro cantaincha icamapinijeitaque poshiniri omoncaratantacari icantiriniri.¹⁹ Peerani icamantiri Moishishi maaroni icoacaajeitiriri arioririnteni, irosati isanquenatantarori. Impoiji icamantajeitiri ishaninca icantiriri Tasorentsi; impoiji aisati yoajeitaqueri vacajaniqui aisati chivo, yaajatavaquero iriraja, iconojataquero nija. Impoiji yaaquero iviti ovisha quitioncapitiri aisati casancashiri, yovincaquero ojaqui, isaitantariri ishanincapee. Aisati isaitaquero iroori oca isanquenatacaaqueriri Tasorentsi.²⁰ Ariorica isaijeitaqueri, icantajeitiri ishaninca: “Ari nocamantajeitaquempiro maaroni iroquierari icamantaquenari Tasorentsi. Icanti: ‘Ariorica pinquemisantajeitena, nontasoncacoventajeitempi’. Aisati avirori picantajeiti: ‘Cameetsa’. Irootaque nosaitantaquempiroi meeca iriraja”.²¹ Impoiji isaitaquero aisati pancotsi iquemisantajeitantzari, aisati isaijeitaquero maaroni timayetatsiri tsompoina.²² Ari isanquenatini Moishishi: “Irootaque iriraja poshiniri oameetsajeitirori paitapeerica; aisati eirorica itimi camimenterineri atiri, amparajimenterineri iriraja, eiro yavisacotajitsi”.

Iquenquetsatacotiro paita icamimentantaqueeri Quirishito.

²³ Ari otimi oshiacantiri oca pancotsi aisati maaroni timajeitatsiri tsompoina. Ocameetsati isaijeitaquero yoameetsatantarori. Iro cantaincha otimi inquitequi oca ishiacantajeitaqueri, itimi aisati anaacotirori iriraja virantsi, oameetsatasanotirori maaroni

timajeitatsiri inquitequi: ²⁴iriotaque Quirishito. Yora saserotepee ijatapiniti anta pancotsiqui yovetsicajeitiri atiri, ishiacanteetiro: “Inantari Tasorentsi”. Iranti Quirishito ijatasanotaji itimasanotinta Tasorentsi, icantacoventajeitaquee. ²⁵Yora ivincatsarite saserote ijatapiniti anta inantariqui Tasorentsi, yaapinitiro maaroni osarintsiqui iriraja poshiniri: te irayeroji iriraja irashi iriori. Te irijatapiniteji iranti Quirishito iraapinitantearori iriraja. ²⁶Arioricame iraapiniterome iriraja Tasorentsi, oncameetsateme incamapiniteme, peerani catsini: yovetsicantarori quipatsi, irintearome incamapiniteme, irosati meecame. Iro cantaincha moncarataca peerani icamantacari: aparoni icamaque, yoavisacojeitaquee. ²⁷Ayojeitaque aparo acamajeitaque, toren, ari acarati; te ampiitapiniteroji ancame. Ariorica ancamaque, impoiji incantacoventajeitaquee Tasorentsi. ²⁸Ari oshequi anajeiveta, iro cantaincha aparo icamimentajeitaquee Quirishito; imoncarataquero, eiro icamajitsi aisati. Impocaje aisati coajica ancorajeitasanotajeri, ancorajeiteri aisati maaroni itsipapee aamaajeitariri meeca.

Tecatsi oncantajeitee isanquenare Moishishi oameetsajeitee.

10

¹Pamene, maaroni isanquenatacotaquerini peerani Moishishi oshiacantaqueri yora pocapaintatsiniri, cameetsatasanotatsiri. Yareetapainta, oshequi itasoncaventajeitaquee. Icantiri Moishishi Aaro: “Poapiniteneri Tasorentsi virantsi maaroni osarintsiqui”. Ari icantani ishanincani yoapinijeivetari, iro cantaincha tecatsi oncanteri oavvisacojeiteri yora quemisantirori isanquenatiniri Moishishini. ²Arime oavvisacojeiterime yoca yoapinitiri, tempa iroimpacayerome yoapinitiniri. Aisatime iroavvisacotajeame yora, eiro iquenqueshirejeitajirome aisati yantayetiri. ³Iro cantaincha yoapinijeivetari ivira maaroni osarintsiqui, irosati icanta oquenqueshiretacaapinitiri yantayetiri. ⁴Tecatsi oncanteri iriraja vaca aisati chivo oameetsajeiteri antirori caari cameetsatatsi. ⁵Ipcantacari quipatsiqui peerani Quirishito, tempa icantiri Tasorentsi: “Apa, te pineacameetsatasanoteroji iriraja virantsi, te oameetsajeiteri antajeitirori caari cameetsatatsi. Irootaque pivetsicantanarori novatsa noncamimentajeitanteariri maaroni atiri, noameetsajeitanteariri. ⁶Te pineacameetsateriji maaroni itaapinijeivetimpri atiri, aisati maaroni yoapinijeivetimpri poameetsajeitantearimeri. ⁷Irootaque nocantantimpri: ‘Pamene, Apa, nopoque aca nantantempirori maaroni picoacaquenari. Nomoncaratero maaroni isanquenatacotiteetaquenaniri peerani’ ”.

⁸Pinquenqueshiretasanotero oca icantiniri Jesoshi: “Te pincoyeji, Apa, iroajeitimpri atiri virantsi, intaapinijeitimpri. Te pineacameetsatimenteriji yora pavetimpri maaroni isanquenatacotiniri Moishishi”. ⁹Impoiji icantiri: “Pamene, Apa, pocaquena nantantempirori

maaroni picoacaquenari". Icantantarori oca, icanti: "Ontimaite maaroni yantayevetaniri ishanincani Irevi. Ontime iroqueratajantsineri".

¹⁰Aparo icamimentajeitaquee Jeso quirishito, eiro yapiitajatsi incamajé aisati, imoncarataquero. Yoameetsatasanojeitaquee, aisati maaroni iriori quemisantajeitiriri, iquempetacantajeitaquee te anteroji caari cameetsatatsi.

**Te iroavisacotanteji virantsi yora yoyeetiri,
irinti Quirishito oavisacotantatsiri.**

¹¹Ari yantaveetapinitaque maaroni saserotepee, yoapinitiniri Tasorentsi virantsi, itaapinitiniri, iro cantaincha te oameetsajeiteriji maaroni antirori caari cameetsatatsi. ¹²Iro cantaincha aparoni icamimentajeitaquee Quirishito, yoameetsajeitajeeeri, moncarataca. Impoiji isavicapajji anta iracosanoriqui Iriri, ¹³yoyeaqueri irimatantearori icantaqueriniri: "Coajica nontsoncajeiteri maaroni quisajeitaquempi". ¹⁴Aparo icamimentajeitaquee maaroni: tempa icoyeajeitaquee Tasorentsi, yoameetsatasanojeitaquee. ¹⁵Aisati oametasanojeitaquee Ishire Tasorentsi queario nosanquenataquempi; tempa osanquenatacainini peeraniniri: "Icanti Tasorentsi: ¹⁶'Tempa narotaque Ivincatsarite jorio, irootaque noncantajeitantariri: Te pimajeiteroji nocantaqueriri Moishishi, iro cantaincha coajica nonquenqueshiretacajeeitempiro maaroni noocoacaajeitaquempi, pintsoeteajeitajero, piotasanojeitajero, maaroni' ". ¹⁷Impoiji aisati osanquenatacaaqueri: "Icanti Tasorentsi: 'Eiro noquenqueshiretacotitajiritsi aisati caari cameetsayetatsi yantajeitaqueri' ". ¹⁸Pamene, ariorica icavintsaajeitiri Tasorentsi antirori caari cameetsatatsi, aisati terica inquenqueshiretacotajeri aisati yantaqueri, eiro icoajitsi aisati camimenterineri iroameetsatantariri. Pinequiero, ineacameetsajeitaquee meeca.

Icamantajeitaquee paita icoacaajeitaqueeri arori.

¹⁹Noyemisantarinente, icamimentajeitaquee Quirishito, yaparajatimentajeitaqueero iriraja yoavisacotantaqueeri. Meeca ayojeitaque ineacameetsajeitaquee Tasorentsi, ocameetsatantari anquenquetsatacaapinijeiteri. ²⁰Peerani otimini pancotsiqui oticaashiro, ora caari ijatapinijeitantan atiri onta inantarinta Tasorentsi: tempa oticaajeitaqueri. Iro cantaincha icamimentajeitaquee Quirishito, caari otimantaja meeca ticaajeeneri. Yaneanaji aisati, irootaque ocameetsatantari meeca anquenquetsatacaapiniteri Tasorentsi. ²¹Isaserotetasanotaque, ipincatsariventasanojeitaquee arori, aisati maaroni itsipapee quemisantajeitiriri Tasorentsi. ²²Yaparajatimentajeitaqueero iriraja, aisati avaotisatimentajeitacari. Irootaque meeca eiro atsaroacantaritsi Tasorentsi, ayojeitaquee eiro

yoipiajeiteetsi, irointi iraacameetsatasanojeitee. ²³ Ayojeitaque irimataqueenero maaroni icantajeitaqueeri, eiro yamatavijeiteetsi: irootaque ocameetsatantari ancamantajeiteri itsipapee atiri oca aquemisantaqueri.

²⁴ Tsame meeca anquenqueshirejeiteri itsipapee: anintajeiteri aisati ancavintsaajeiteri. ²⁵ Timatsi ayemisantaririnte caari pocapinitatsi inquemisante: eiro piquempejeitaritsi avirori, irointi pampatotapinijeitea poimoshirencavacaajeitanteari maaroni. Tempa ayojeiti eiro osamanititsi impocantajeari Quirishito, irootaque ocameetsatantari aveshireimentajeiteari aisati aveshireacaaajeiteari itsipapee. ²⁶ Pamene, ariorica ayojeitaque icamimentajeitee Quirishito, irootaque yoavisacotantaqueeri, ocameetsataque ashiretearo, anquemisantasanojeiteri: tempa irootaque icantiriri Tasorentsi, oqueariotasanoque. Te oncameetsateji catsini antseenqueri, te aneriji pashini oavisacoteeneri. ²⁷ Aitaque coajica inquisajeitanaqueri Tasorentsi maaroni tseenquiriri, iroasanquetasanojeiteri. Impoyereajeitajeri maaroni iisane, poyere. ²⁸ Yora ajorioririnteni yoapinijeitaquerini caari pincatsatiro isanquenare Moishishi. Itimirica apite cantatsiri, ariorica icarati mava cantatsiri: “Ainiro yantane, noneajeitaqueri”, ari yoajeitaqueri ishaninca. Te incavintsaajeitimateriji. ²⁹ Ariorica intseenqueri atiri Itomi Tasorentsi, aisati incanterica: “Yatsipetashita icamaque Quirishito, yatsipetashita yaparajataquero iriraja, eiro yoavisacoteetsi”; aisati incantimateroricu Ishire Tasorentsi, ora cavintsaajeiteeri: ¿pijitimpa eiro yoasanquetirtsu Tasorentsi? Aitaque iroasanquetasanoque, catsini: irineashiiitetearotate, ironea caari iquemisantantari. ³⁰ Tempa ayojeitiri, ayojeiti icanti: “Aitaque nompiajeiteari, noasanquetaajeiteri nainti”. Aisati icanti: “Queario noncantacotentajeiteri maaroni atiri, tempa naro pincatsariventacojeitiriri”. ³¹ Ariorica intsencante atiripee, inquisaqueri Tasorentsi, yora aneasanotatsiri: ocameetsati intsaroacaasanojeiteari catsini, yoashinoncairicari.

Icantiri: “Pinquearioventero pinquemisante, eiro pitsaroitsi pashinoncaimenteari Quirishito”.

³² Pinquenqueshirejeitaja jaoca ocantari peerani, iroquerani piquemacotaquerini Quirishito. Iquishimentajeitaquempiro pishaninca piquemisanti, ³³ ishirontimentajeitaquempi, yoashinoncaajeitaquempi. Aisati pineajeitaqueri yoashinoncaajeitaqueri itsipapee piyemisantaririnte. ³⁴ Picavintsaapinitaqueri yora yoiminquearanteetaqueri. Ariorica icoshitaquempini pivaararo, piquimoshirejeitaqueni, picantini: “Irayerota. Coajica ontimasanoyetaje cameetsayetatsiri anta inquitequi, eiro itimajitsi coshitajeeneri anta.

Ancantaitatiyempani asavicajeite anta ocameetsaitetinta catsini”.

³⁵ Eiro pipeacotarotsi piquimoshireimentiri, aiquero pijatatiye pinquimoshirejitanaque. Queario, impinatempi Tasorentsi.

³⁶ Ocameetsati pincanteani pinquearioventero maaroni icoacaimpiri Tasorentsi, impoiji irimatempiro icantaquempi. ³⁷ Tempa ocantini sanquenarentsi: “Irotajantsi ipocaje Avincatsarite, eiro osamanititsi, tempa icanti: ‘Nompocaje. ³⁸ Ocameetsati inquemisantasanojeiteña yora noameetsantiri. Iro cantaincha irojocajerorica iquemisanti, eiro noveshireimentajaritsi’ ”. ³⁹ Te ancarajeiteriji arori yora jocajeitirori iquemisanti: irijajeite iriori Sharincaveniqui. Aquemisantajeiti ainti, ajajeite ainti inquitequi.

Yantajeitiniri quemisantasano notatsiniri peerani.

11 ¹ Piquemisantiri Tasorentsi piotasanolantacari irimatasantempio maaroni icantaquempi. Ainirotatsi oshequi caariquera aneajeiti, iro cantaincha aquemisantajeiti, irootaque ayojeitancacari aneajeitajero coajicaní maaroni icashiacaajeitaqueeri. ² Iquemisantini yora peeraniniri, irootaque ineacameetsatantariri Tasorentsi. ³ Aquemisantajiri arori, irootaque ayojeitancacari ineanataque Tasorentsi otimantacari quipatsi, inquite, aisati maaroni timantarori. Ineanataque otimantanacari: tecatsi irovetsicantearori. ⁴ Iquemisantini Averini, irootaque ineacameetsatitancacariri Tasorentsi ipaqueriri; irintiquea Caini, te inquemisanteji, irootaque caari ineacameetsatantararo ipavetacariri iriori. Ineacameetsataqueri Tasorentsi Averini, irootaque ineacameetsatitancacariri ipaqueriri. Icamakeni iriori peerani, iro cantaincha ocameetsati anquempejeiteari: anquemisantajeite irineacameetsajeitanteeri Tasorentsi. ⁵ Iquemisantini Enoco, caari icamanta. Aneatsi ini, yaanajiri Tasorentsi inquitequi. Tecatsi neajerine aisati: queario, yaasanotanajiri inquitequi. Tequerani iraayerini, icantini: “Queario, noneacameetsatasanotaqueri Enoco”. ⁶ Eirorica aquemisantiri, eiro ineacameetsajeiteetsi. Intimerica coatsiri irareeteari Tasorentsi, ocameetsati inquemisantasano teri, aisati iriotasanotanaque impinateri coasanotatsiri irioteri.

⁷ Aisati iquemisantini Noeni. Icantirini Tasorentsi: “Coajica ompoque antearo incani catsini, incajaretanaque maaroni. Pivetsiquero antearo pitotsi paviscotantajeari”. Ari iquemisantaqueri. Osarintsitasanovetani, iro cantaincha yantaque pitotsi, yavisacotantajari, aisati yavisacojeitancacariri maaroni saviquimojeitiriri. Te inquemisantajeiteji itsipapee ishaninca, irootaque yoasanquejeitancacariri Tasorentsi. Irintiquea Noeni yoameetsantiri: tempa iquemisantiri irinti.

⁸ Aisati iriorini Avaramani, iquemisantirini Tasorentsi. Icantirini iriori: “Nocoaque pijate pashiniqui quipatsi, anta arejiqui: aitaque

pisaviceperi. Nompempiro pashitasanoteari avirori; aisati nomperi pitomi, piccharine, maaroni. Tsame pijate, nocoi nonijayempiro”. Ari ijatanaque, iro cantaincha te irioteji jaocarica irijateri. ⁹Yareetantacari, ineapaqueri pashini atiri savicajeitatsiri. Oquempevetaca caari iipatsite, te irisavicasanoteji, irointi iquenayetaque; iro cantaincha icantani iquemisantiri Tasorentsi. Aisati iquempejeitaca Isaca aisati Jacovo: te irisavicasanoteji, te irivetsicajeiteji cameetsari ivanco, ¹⁰irointi iquenqueshirejeitiro pashini inampi, caari yovetsiqui atiri. Iojeitaque coajica iraajeitanajeri Tasorentsi anta inampiqui iriori, yovetsicaqueri iriori. ¹¹Oquemisantini Sarani: shiravar oni, te intimeni otomi. Impoiji anteashipatanaque. Icantaquero Tasorentsi: “Coajica intime pitomi”, irosati oquemisantantacariri. Ocanti: “Eiro yamatavitanatsi Tasorentsi”. Impoiji itimaque. ¹²Aisati yanteashipatasanotaqueni Avaramani, oshequitasanotaque irosarintsite. Te intimaveteaji catsini itomi, iro cantaincha impoiji itimacaquero ijina otomi. Meeca icarajeiti ishanincani oshequi catsini, tecatsi ancanteri ayojeiteri jaocarica icarajeitiri: iquempejeitacari impoquiropee, tecatsi ancanteri ayojeiteri jaocarica icarajeitiri. Aisati iquempejeitacaro ovane impanequi anta otsapijaqui incajare, oshequi catsini.

¹³Ari icamajeitaque iriorijei quemisantatsiniri: isavicajeivetani Canaqui, iro cantaincha te irineasanojeiteroji maaroni icantaueriniri Tasorentsi. Iro cantaincha iojeitaque irineajero coajica. Icantajeitini: “Te nonampitasanotearojo quipatsica, te nosavicasanoteji aca”. ¹⁴Irootaque ayojeitancaraci icoajeitaqueni irareejeitea pashiniqui nampsitsi irinampitasanotantapajearori. ¹⁵Incoajeitajeme impiajeitanajeme anta Ejipitoqui iponeantacari, ari irijajeiteme. ¹⁶Iro cantaincha icoajeitaque irijajeite cameetsaiteriqui nampsitsi: ora timatsiri inquitequi. Irootaque yoveshireimentantacariri Tasorentsi iriori: te impashiventacaimateariji, itomintasanojeitacari. Aisati yovetsicajeitiniri isavicajeitancari. ¹⁷(-)

¹⁸Peerani icantirini Tasorentsi Avaramani: “Meeca itimi pitomi papanirorite, pipajitiri Isaca. Iriotaque ashijeitearineri pincharinentayetajeari, maaroni. Tecatsi itsipa ashitearine”. (v 17) Ari yevancaritapaini Isaca, irosati ineantantariri Tasorentsi Avarama, iriotanteari queariorica iquemisantsanotiri. Icantiri: “Poyenari pitomi papanirorite, pintayenari”. Ari iquemisantirini, icantiri: “Ari, nojate noyeri”. ¹⁹Iquenqueshiretaca: “Icantana Tasorentsi: ‘Iriotaque ashijeitearine pincharinentayetajeari, maaroni’. Tequera intime itomi iriori, iro cantaincha icantaquena: ‘Poyerí’. Naamaaca ariorica noyeri, irointinaajeri”. Ijatanaque, irotaintsi iroyerime, iro cantaincha icantiri Tasorentsi: “Eiro poirltsi, irointi noneantimpi. Meeca niotaque pipincatsatasanotaquena”. Ari oquempetimovetacari Avarama yoitinaajiniri itomi, yaneanaji aisati.

²⁰ Aisati iquemisantini Isacani, irootaque icantacoventantariri Jacovo aisati Esao. Icantiri Tasorentsi: "Pintasoncacoventerri notomi apite". Irootaque itasoncacoventantanariri oshequi. ²¹ Aisati iquempetani Jacovoni, iquemisantini. Irotaintsi incame, iro cantaincha ititacaro iotiquiro; yoivotashitacari Tasorentsi, icantiri: "Pintasoncacoventajeiteri itomipee Jose". ²² Aisati iriorini Jose, iquemisantini. Peerani itimini Ejipitoqui, aisati maaroni ishaninca, iro cantaincha iotaque iraajeitanajeri joriopee anta iipatsitequi iriori. Irootaque icantantariri ishaninca: "Irotaintsi noncame. Coajica, ariorica pijajeitanaje aipatsitequi arori, paajeitanajeroyea notonquini, pintijapaajero".

²³ Peerani icantajeivetarini yora ivincatsarite ejipitosati: "Noshaninca, pineaqueri yoshequiaeitanaque joriopee: te oncameetsateji. Pijajeite piviiincajeiteri maaroni itomipee, iroaqera timayetatsiri". Ari yora iriri Moishishi iquemisantini, aisati iriniro: ipincatsajeitirini Tasorentsi, irootaque icantantari: "Eiro apincatsatiritsi irinti ivincatsarite ejipitosati. Icameetsataque atomi, eiro ashinetiritsi iroviiinquiteeri". Ari imanapitsataqueri, caari yoantari. ²⁴ Ari impoiji oneaqueri Moishishi irishinto pincatsari. Oquenqueshireti: "Eiro noiritsi, irointi nonquempetacantajeri notomi, intime novancoqui". Impoiji yan tearitanaque. Iquemisantaqueri Tasorentsi, irootaque icantantari: "Te noncoyeji noshanincateari ejipitosati, naro jorio". ²⁵ Iotaque iquemisantajeiti joriopee, irootaque yoashinoncaajeitancariri ejipitosati. Iquimoshirejeivetaca ejipitosati, iro cantaincha te oncameetsateji itimajeiti, irootaque caari icoanta Moishishi irishanincajeiteari. ²⁶ Te incoyeriji iirequite ejipitosati isaviquimovetacari, irinti icoasanotaque iquemisantiri Quirishito, iquematsicatimentacari iriori. Iotaqueni coajica impinateri Tasorentsi. ²⁷ Iquemisantini, iotaque te inconjateji Tasorentsi, iro cantaincha iotaque quiso yoiri; irootaque caari itsaroacantari pincatsari, aisati ishiaptsajeitancariri ejipitosati, yaajeitanaqueri maaroni ijorioririnte. ²⁸ Aisati iquemisantiri Tasorentsi, yora cantiriri: "Meeca tsiteniri nontianqueri nonampire iroyeri itomipee tseencajeitanari, yora jivatatsiri itimi. Iro cantaincha ariorica poyer ovisha, pisaitero pivanco iriraja, iravisanteari yora oantatsiri, tecatsiquea incanteri pitomipee". Ari iquemisantaqueri Moishishi, aisati iquemisantacaajeitaqueri ijorioririnte, caari icamajeitanta itomipee. Iro apajitantarori quitaiteri: "Yavisantaniri".

²⁹ Aisati iquemisantajeitini maaroni joriopee. Ishiaptsajeitacari yora isorarotepee ejipitosati. Yojajaeivetanacari, iraavajerime. Jero oticajeitaqueri joriopee antearoja incajare, tecatsi inquenajeitanaje. Iotaque Tasorentsi iquemisantajeitiri, irootaque iteencajeitatantacarori incajare, oquipatsitanaque nianqui. Jentsipaite yavisajeitanaque intatiquero maaroni joriopee. Yojajaeivetapaacari ejipitosati, iro cantaincha yoipiajatajiro Tasorentsi incajare, aajeitaqueri soraropee.

³⁰ Aisati iquemisantajeitini joriopee anta Jericoqui. Itantacotasanojeitaca savicajeitatsiri, iticajeitavaqueri joriopee. Iro cantaincha icantiri Tasorentsí: "Pishonajeitanaquearo nampitsi, paniijeitanaque. Aparo quitaiteri, aparo pishonajearo; otsipa aisati, otsipa aisati, irosati 7 quitaiteri". Ari omoncaratapaaca quitaiteri 7, irosati otireantanaca tantotsi. Icamajeitanaque tseencantatsiri, savicajeitatsiri.

³¹ Otimi anta aparoni tsinane, pajitachaniri Arava. Peerani oshequi antayetirini shiramparipee caari ai. Oquemisantaji iroori, amitacotantariri itiancanepee Josoe iramenero nampitsi. Te oncameji irointi anta Jericoqui, te onquempeteariji itsipapee tseencajeitantsiri.

³² ¿Paita pashini nonquenquetsatacoteri? Oshequitanaque meeca nosanquenare, iro cantaincha itimi oshequi catsini itsipapee quemisantajeitiriri Tasorentsí: Quereo, Varaca, Santso, Jete, Iraviri, Samoiri, aisati itsipapee quenquetsatacantatsiniri. Eiro meeca notsoteirotsi yantayetiri maaroni. ³³ Iquemisantajeitirini Tasorentsí, itsoncajeitantaquacariri oajeiterinemeri. Iquemisanti itsipapee imatantarori cameetsa ipincatsariventajeitiri ishaninca, aisati imatantacanariri Tasorentsí icantaqueriri. Yojoqueevetari manitimashiqui, iro cantaincha iquemisantini, irootaque caari yoantarini. ³⁴ Pashini yojoqueevetari paamariqui, iro cantaincha te intayeaji. Impsheeterime itsipapee, iro cantaincha yoavisacotaarantaqueri Tasorentsí. Imantsiatarantaque, iro cantaincha yoavisacotaarantaqueri, ishindsightacaarantaqueri. Imatacarantaqueri manatachari. Yoimishiaarantaqueri manaterinemeri quemisantatsiri. ³⁵ Oquemisanti tsinanepee, irootaque itinaantajari ojimeni, aisati otomipee.

Yoashinonhaaranteetaqueri itsipapee quemisantatsiri, yoatsinaaaranteetaqueri; icantiri: "Ariorica pojocajero piquemisanti, ari cameetsa noimpacajempi". Iro cantaincha icantiri: "Eiro nojоquirotsi noquemisanti. Coajica cameetsa irisavicacayena Tasorentsí". ³⁶ Ari ishirontimentaarantacari, ipasanataarantaqueri, tac, tac, tac; yoisotaarantaqueri carenatsaqui, yoiminquiaarantaqueri, ³⁷ ipichaarantaqueri mapi, pitse, pitse, pitse. Itotaqueri ichaquireaqueri, chaquire. Ipsaarantaqueri, peti. Itsipapee te inquitsaateaji cameetsa, irointi iquitsaatashitacari imeshina ovisha aisati imeshina chivo; ocoiteimotacari paitapeerica, iquisheetaaqueri, yoashinonqueetaqueri. ³⁸ Iquenayetanaque caaraiteriqui aisati toncaariqui. Imanapitsayetacari quisiqueriri anta omoropeequi toncaari. Icameetsatasanojeitaqueni, iro cantaincha te iraacameetsanirotpeariji yora tseencantatsiri. ³⁹ Ari iquemisantajeitaqueni, irootaque ineacameetsatantaracariri Tasorentsí, irinti; iro cantaincha te irineasanojeiteroji maaroni icantajeivetacariri. ⁴⁰ Ocameetsatasanotaque icoacaajeitaqueeri Tasorentsí: te incoacaajeiteriji yora peeraniniri irijivajeitee irineajeitero, irointi icoaque amoncaratavacaajeitea aneajeitero maaroni.

**Icantiri: “Pinquearioventeneri Tasorentsi
icoacaimpiri, eiro pishemashireatsi”.**

12

¹ Ari oshequi i quemisantajeitaqueni maaroni yocapee noquenquetsatacojeitaqueri. Meeca oquempetaca yapatotashijeitaquee, yamenacojeitaquee iriojeitanteari paitarica antajeiteri arori. Noshiacantempiro: tempa yamejeita evancaripee ishiajeita iriotanteari janicarica anaacotantatsineri. Ariorica irishianaque, tecatsi inquijanaque, irointi yojocanaquero iitsaare irishiasanotanteari. Aisati ocameetsati ajocajero caari cameetsatatsi antajeivetari amatantearori maaroni icoacajeiteeri Tasorentsi, anquearioventero. ² Ancanteani anquenqueshirejeiteri Jesoshi, yora oavisacojeitaqueeri peerani, aisati iriotaque aa jeitanajeeneri coajica inquitequi. Oshequi i quematsicatimentajeitaquee coroshipi peerani, oshequi yoashiventaaajeitaqueri iriori. Iro cantaincha iotaque irisavicasacaajeitjee cameetsa anta inquitequi, irootaque i quematsicatimentantaqueeri. Meeca isaviqui iriori anta iracosanoriqui Tasorentsi, icarajeitaqueri ipincatsariventajeitaquee. ³ Oshequi peerani i quisajeitaqueri tseencantatsiri, oshequi yoashinoncaajeitaqueri. Meeca ocameetsati pinquenqueshiretasanojeiteri, impoiji eiro poashiretatsi, eiro pishemashireatsi.

**Yoasanquetaaqueri Tasorentsi quemisantatsiri
antirori caari cameetsatatsi.**

⁴ Ari picantayevetari antirori caari cameetsajeitatsi: “Pojocajero pantayetiri”, iro cantaincha tequera inquishimentajeittempiro. Tequera iroimentempiro, tequera iroashinoncaimentempiro. ⁵ Pipeacotarompa itomintaquempi Tasorentsi? Pinquenqueshiretajero aisati oca isanquenatacaaqueriri peeraniniri: “Notiomí, ariorica noasanquetayempi, eiro piquisanatsi, tempa narotaque pivincatsarite. Aisati ariorica noasanquetayempi, eiro pishemashireanatsi. ⁶ Ariorica irantero nonintane caari cameetsatatsi, noasanquetaapiniteri. Nocoaque niotacanteariri te oncameetsateji irampiitapinitero. Ariorica noasanquetayempi piotanteari notomintasanotaquempi”.

⁷ Ariorica iroasanquetaajeitempi Tasorentsi, eiro pishemashireatsi. Inintajeitaquempi, itomintajeitaquempi, irootaque yoasanquetantaquempi. Tempa amejeitaro arori avasanquetaapinijeitiri atomipee. ⁸ Maarori shirampari yoasanquetaajeitaqueri itomipee. Eirorica yoasanquetaimpitsi Tasorentsi, te aviro itomi, irishinto: te pishanincateariji. ⁹ Yoasanquetaajeitaquee ashijeiteeri, iro cantaincha tempa apincatsajeitaqueri. Tempa aisati ocameetsati ampincatsajeiteri Tasorentsi ashijeiteeri, ancantaitatiyempani asavicanteri anta inquitequi. ¹⁰ Yora ashijeiteeri yoasanquetaajeitaquee aisati

yoamejeitaquee ayojeitasantacari asavicafeiti cameetsa aca quipatsiqui: eiro osamanititsi, ari ancamaque. Aisati yora ashijeiteeri te iriojeiteji maaroni, irointi yaamaashiyeta iriori; ainiro iquisashitee. Irintiquea Tasorentsi, te iraamaashiyeteaji irinti, cameetsa yoasanquetaafeitaquee, cameetsa yoametasanojeitaquee. Impoiji ancarajeiteri iriori ancantaitatiyempani ancameetsatasanojeitapaaaje. ¹¹ Ariorica yoasanquetayee, tempa avashirevetanaca, te anquimoshirevetanajeaji. Iro cantaincha impoiji aquenqueshiretanaja, ayotaque yoamejeitaquee anquimoshirejeitanaque aisati ancameetsatanaque.

Icantiri: “Piveshireimentajeiteari Tasorentsi”.

¹² Piquempejeivetaca pimaotsajeitaque. Pintinaanaje, pishintsitanaje: queario iquishimentajeitaquempiro piquemisantajeiti, iro cantaincha piveshireajeitanaquea. ¹³ Pinquearioventero icoacaimpiri Tasorentsi. Piveshireacaafeiteari piyemisantaririnte oashirejeivetachari inquemisantasanojeitanteeari iriori. ¹⁴ Pincoasanojeite paacameetsajeiteri maaroni itsipapee atiri, eiro piquishirtsu. Aisati pincoasanotaque pintime cameetsa: eiorica pitimi cameetsa, eiro pimatirotsi pinquemisantacaajeiteri itsipapee, eiro ioejitiritsi Avincatsarite. ¹⁵ Pamitacotavacaajeitea, poametavacaajeitea, iriojeitanteeari maaroni ashanincaphee ineshinoncajeitaqueri Tasorentsi. Piquisashireajeitircari pishaninca, te oncameetsateji. Ariorica pinquisavacaajeitea, eiro pitimajeititsi cameetsa, aisati pojocajeitirocari piquemisanti. ^{16,17} Piojeitaque paita yantaquerini Esao. Iriotaque itomi Isaca; Esao iriotaque jivatatsiri itimi; irinti Jacovo, impoitatsiri. Ari yamejeitaca ashijeiteeri icantacoventasanotiri jivatatsiri itimi itomi, intasoncacoventanteariri Tasorentsi. Aisati icantiri: “Aviro poyeetajenaneri, ashiyetajearone timimoyetanari”. Aisati inquempeterime iriori Isaca, incavintsaasanoterime Esao. Iro cantaincha pashini quitateri oshequi iquemaquero iriori itashe, impoiji inequeri irirenti otimi oshequi yoari. Icantiri: “Iye, pimpena noyeari: aasanotaquena notashe”. Icantiri: “Ariorica icantacoventaquea nainti apa, aisati incantena nompoyeetajeari, ari nompaquempiro poyeari”. Icantiri: “Ari, aviroyeampa. ¿Paita noncoanteari nainti incantacoventena coajica? Irotantsi noncame meeca”. Ari ipaqueri yoari. Impoiniji iquenqueshireavetanaja Esao, oshequi iraasanovetanaca, icantavetari iriri: “Apa, nocooasanotaque pincanteri Tasorentsi nompoyetantajempiri”. Icantiri: “Eiro. Nocantacoventaquea meeca parenti. Impoiji meeca picantaquena”. Te incoyeji Esao intasoncacoventerime Tasorentsi, irointi itseencaqueri. Eiro piquempejeitaritsi meeca avirori.

Cameetsa icavintsaajeitaquee Tasorentsi meeca: eiro aquempetaritsi peeraniniri, yora tsaroacaajeitacariniri.

¹⁸ Te pineajeiteroji ineajeitaqueri peeraniniri anta toncaariqui shinaiquiniri, itsaroajeitancacari. Icamantantacariri Tasorentsi Moishishi

maaroni icoacaajeitaqueriri, inequiero omapocanaca otaashitaca paamari, aisati otsitenitanaque quitaiteriqui, inequiero antearo tampea.¹⁹ Iquemajeitaquero ishaninca aisati antearojenca itioti aisati iquemajeitacariri Tasorentsi, itsaroacaajeitacari catsini, icantajeiti: "Eiro pineanajeitanatsi aisati, oshequi notsaroacaajeitaquempi. Nocamicari".²⁰ Icanti Tasorentsi: "Te noncoyeji impoque aca toncaariqui atiri aisati ivira. Impoquerica aca ivira, pimpichaajeiteri, poyer?". Ari itsaroajeitanaque maaroni atiri, catsini.²¹ Aisati iriori Moishishi, itsaroacaajeitacaro maaroni ineajeitaqueri; icanti: "Oshequi notsaroanaque, irootaque noplontantanacari".²² Avintipee, te pijajeiteji Shinaiqui, irootaque caari pitsaroajeitanta. Irointi oquempetaca pijajeitaque anta pashiniqui toncaari, pajitachari Sio, ora timatsiri anta Jerosarequi: shiaquerori inampi Tasorentsi. Pineaquero, oquempetaca pijatasanotaque pashiniqui Jerosare, ora inquitequiniri: pareejitacari Tasorentsi, icavintaasanojeitaquempi, irootaque caari pitsaroajeitanta. Ainiro anta oshequi catsini inampire, yapatotimentajeitacari, ipampoyeaventajeitaqueri, maaroni.²³ Anta intime maaroni quemisantatsiri itomintajetacari Tasorentsi, maaroni savicasanotatsineri anta: ainiro osanquenataca meeca ivajiro, maaroni. Ainiro Tasorentsi, yora cantacoventajeitaqueeri, maaroni. Ainiro aisati maaroni yora quemisantajeitsiniri peerani; yoameetsajeitaqueri Tasorentsi, cameetsa isavicajeiti meeca inquitequi.²⁴ Aisati oquempetaca pareetaca Jesoshiqui, yora oamejeiteeri maaroni icantajeitaqueri Tasorentsi. Peerani yoakeri Caini irirenti Averi, irootaque yoasanquetaantacariri Tasorentsi Caini. Yoyeetaqueri aisati Jesoshi, iro cantaincha icamimentajeitaquee irinti, icavintaasajeitantaqueeri Tasorentsi.

²⁵ Pinquemisantajeiteriye yora quenquetsatacaaajeitimpri, pipiatsataricari. Peerani ipiatsajeitacari ashanincani Moishishi. Ishaninca inaveta, iro cantaincha te inquemisanteriji, irootaque yoasanquetimentajeitacariri Tasorentsi. Caari ini atiri coatsine inquenquequetsatacayempi meeca, irinti Tasorentsi. Oshequi yanaacotantaque ipincatsariti. Eivorica piquemisantirtsirinti, tempa iroasanquetasanojeitempi catsini.²⁶ Peerani anta Shinaiqui iquenquetsatacantacariri Tasorentsi Moishishi, inicaqueri quipatsi. Iro cantaincha icantirini iriori: "Coajica apanivani nonicajero aisati quipatsi, iro cantaincha aisati nonicacoteri inquitesati maaroni".²⁷ Ari icantini: "Apanivani nonicajero aisati". Aitaque intsonquero maaroni nicajeitachaneri, maaroni caari quisotasanotatsi. Ontimaarantanaque irointi caari nicachane.²⁸ Ari coajica asavicajeitantzearo anta pashiniqui quipatsi, ora caari tsoncanetachane: anta impincatsariventasanojeitee. Irootaque ocameetsatantari ampasonquitasanojeiteri, anquearioventeneri maaroni icoacaaqueeri; tsame ampincatsatasanojeiteri maaroni.

Ocameetsati intsaroacaajeiteari maaroni caari pincatsatiri,²⁹ tempa intsoncasanojeitaqueri maaroni tseecajeitiriri, impoyereajeitajeri, maaroni: poyere.

Icantiri: “Pintimajeite cameetsa”.

13 ¹Ari, pinintavacaasanojeitea: pinquempetacanteri itsipapee
irio pirenti pinintasanotiri. ²Ariorica irareetempi caari
pineapiniti, paacameetsatavaqueri. Ainiro aacameetsatavaquerir
caari ineapiniti, ijivetari ishaninca ini yora yaacameetsatiri: jaa,
irinti inampirepee Tasorentsi inajeiti. ³Pincavintaajeiteri maaroni
ayemisantarininte, yora yoiminqueeyetiri: pintimeme anta caravosoqui,
tempa pincoaque me cavintsaajempinemerri avirori. Pincavintaajeiteri
maaroni yoashinonqueeyetiri: tempa pishanincajeitacari. ⁴Ocameetsati
aye ajina; ocameetsati iroori tsinane aye ojime. Ocameetsati irineero
shirampari ijina; ocameetsati oneeri tsinane ojime. Iro cantaincha
iroasanquetaajeiteri Tasorentsi maaroni aimentarori ijina aisati maaroni
aimentariri ojime. Aitaque iroasanquetaajeiteri maaroni antirori caari
yai. ⁵Eiro picoitsi poshequiyeri piquirette, irointi piveshireimentearo
timimojeitimpiri. Tempa icanti Tasorentsi: “Eiro noshinetimpitsi
pashinoncayea, quiso noajeitempi”. ⁶Irootaque ocameetsatantari
ancantapinijeite: “Niotaque intacotapinitaquena Avincatsarite, eiro
noquenqueshireatsi. Tecatsi incantena atiri iroashinoncayena”.

⁷Pinquenqueshiretasanoteri jaoca icantari yora quemisantacaajeitimpiri:
yora oamejeitimpirori irineane Tasorentsi. Pinquenqueshiretasanoteri
maaroni imajeitaqueri, impoiji pinquempejeiteari riiori,
pinquemisantasanojeite. ⁸Te impashinitapiniteji Jesoquirishito,
irosati icanta: peerani, meeca, irosati coajica. ⁹Eiro piquemisantirotsi
yoamejeiteeri Tasorentsi, yora neshinoncajeiteeri. Ainiro
cantimentajeiteerori paitarica avajeiteameri, iro cantaincha
yatsipetashitacaro: te oameetsajeiteriji riорipee, aisati eiro oameetsajeiteetsi
arori. ¹⁰Ari icamimentajeitaquee Quirishito, avavisacojeitantzajari;
irintiquea yora cantiriri saserotepee: “Poyenari novira navisacotantajeari”,
yatsipetashijiteitacaro, eiro yavisacotajitsi. ¹¹Ari yora ivincatsaritepee
saserote yoapinitiri virantsi aisati yaajatapinitiro iriraja anta ivancoqui
Tasorentsi. Icantiri Tasorentsi: “Ainiro irantane noshinanca, irootaque
noantariri virantsi piotanteari icoaque pincavintsayeri. Jero oca iriraja”.
Impoiji yaajeitan aquero ivatsani virantsi anta arejiqui, itaaqueri. ¹²Aisati
iquempetacantaqueri Jesoshi, yaajeitan aqueri arejiqui yoantacariri: te ari
iroyeri nampitsiqui. Iro cantaincha icamaque yoameetsajeitantaqueeri.

¹³Ariorica irishirontimentee tseencantatsiri, ariorica
iroashinoncajeitee, iro cantaincha ocameetsati ancanteani

anquemisanteri Jesoshi. Tempa ishirontimentajeitacari iriori, yoashinoncaajeitaqueri.¹⁴ Caari oni anampisanori oca quipatsi, irointiquea acoajeitaque anampitasanotearo anta inquitequi.¹⁵ Ariorica aquemisantaqueri Jesoquirishito, ocameetsati ancamantapinijeiteri itsipapee: “Oshequi icameetsataque Tasorentsi, oshequi nopincatsatiri”.¹⁶ Pincanteani pantayetero cameetsayetatsiri aisati pincavintsaajeiteri itsipapee: irootaque icoacaajeitaquempi Tasorentsi.

¹⁷Pinquemisantajeiteri yora quenquetsatacaaajeitimpiori irineane Tasorentsi, pimpincatsajeiteri. Ocameetsati iroamejeitempi iriori cameetsa, pincameetsashirejeitajeari. Coajica irisampitavaqueri Tasorentsi: “¿Paita poametaqueriri yora piquemisantaceaajeitaqueri? ¿Cameetsampa iquemisantaquempi?” Ari incamanteri. Tempa cameetsa iranqueri: “Je, cameetsa iquemisantajeitaquena”. Iro cantaincha eiorica piquemisantiri, incanteri: “Teve inquemisantenaji”, impoiji iroasanquetempi Tasorentsi. ¹⁸Te nioteji ainirorica nantane, naamaaca te aneroji; iro cantaincha nocoaque pincanteri Tasorentsi oncanteata eiro otimantatsi catsini. ¹⁹Aisati pincanteri oncanteataquea nareetitantajempiri aisati, aneavacantajeari. ²⁰Aisati noncanteri iramatacojeitempi avirori. Niotaque inquemisantena Tasorentsi, tempa itasoncacoventajeitaquee: icoaque irisavicacaajeitee cameetsa. Peerani aisati yoitinaanajiri Avincatsarite Jesoquirishito: yora cantacoventajeitaqueeri, amenacoventajeitaqueeri. Yamenacoventajeitaquee, iquempetacari ashitariri irovishate, yamenajeitiri. Icamimentajeitaquee ayojeitantacari queario icantajeeri Tasorentsi: “Noavisacojeitempi, nosavicacayempi aca nonampiquica, pincantaitatiyempani”. ²¹Nocantajerri: “Poameetsatasanojeiteri noshaninca, pimatacayeri cameetsayetatsiri irantajeitatempirori maaroni picoacaajeitaqueri: tempa iquemisantajeitaqueri Jesoquirishito”. Aisati nocantajeitimpri avirorije: “Pimpincatsatasanojeiteri Quirishito, pincantaitatiyempani. Aitaque ancantajeiteari”.

Ivecarataquero isanquenare.

²²Noshaninca, te oshequiteji oca nosanquenajeitimpri: pinquenqueshiretasanojeitero. ²³Piojeitaque yoiminqueetaqueri Timoteo caravosoqui, iro cantaincha isotoanaji meeca. Ariorica jentsipaite irareetea aca, nontsipatanajeari ara pinampiqui, noneajeitapajempi. ²⁴Novetsajeitacari maaroni quenquetsatacantatsiri aisati maaroni ayemisantaririnte. Ivetsajeitaquempi maaroni itariasati. ²⁵Nocoaque incavintsaajeitempi Tasorentsi, maaroni. Aitaque incanteari. Ari ocarati.